

MUNDO DI MUSICA

Skirbi pa Joy Kock

Disciplina ariba tereno di musica ta algo cu ta falta masha hopi na Aruba. Nos no kier generaliza. Varios bez nos a yega di presencia con tin cierto musiconan ta yega nan trabao mey hora of mas ainda laat, y ta cana un pia, pia, manera nada no a pasa. Nos sa tambe cu mayoria di agrupacionnan musical nunca ta cuminsa train na hora stipula. Nos conoce varios músicos, cu semper tin un paar di wise guys cu ta play importante

y ta cana kibra yega hora nan ta haya ta bon.

Personanan asina ta falta tur respet pa nan coleganan, e publico, cu mester sinta warda ariba nan y pa musica mes.

Nos a yega di presencia con gruponan mester a bay back sin graba na Tele Aruba pasobra un o mas tocador no ta yega na ora. Tele Aruba tin su compromisonan y simplemente ta sigui cu nan otro trabaonan.

Tambe nos sa cu tin

biaha studionan di grabacion cu tin nan schedule pa grabacion mester pasa den amargura pa motibo di un o otro músico cu no ta yena na tempo.

Esey ta puramente falta di disciplina y nada mas. Den mi opinion otro falta di disciplina ta cu ora bo ta mira un cantante ta lesa texto di e musica cu ta colga na e stand di microphone. Hasta na television tin un o dos grupo cu ta haci esaki ainda.

Kico ta tuma un persona pa siña un texto for di su memoria. Uniform tambe ta forma otro problema na momento cu bo ta haya cu un kier ta mihor bisti cu otro y nan ta pone algo extra pa sobresali y hala atencion.

Corda bon cu mi a cuminsa na skirbi cu mi no ta generalizando. Mi conoce gruponan cu hopi disciplina ariba tur tereno y ta nan semper a yega leo. Berdadero disciplina di

un músico ta: train oranan largo tur dis. Ta presente na ora pa training cu bo grupo. Ta por lo menos mey hora na fiesta promer cu esaki cuminsa. Bisti e uniform manera e manager pidi. Warm up na cas y no na fiesta, asina aki bo por stem bo instrumento mas liher y bo no ta fada esnan presente cu e mes un tono fastioso keto bay. Siña e textonan di cancionnan di memoria y hinca bo alma, curpa y curazon tras di bo musica.

IMPORTANCIA DI UN CONTRACT

Ta pasa varios bez cu un agrupacion musical, cantante individual, duo, trio, etc, no sa con pa formula un contract correctamente. Tin hasta ta haci presentacionnan sin contract. Esaki ta algo cu

por tin su consecuencia nan.

Talbez bo por duna cierto confianza na cierto personanan, cu bo por tin costumbre di actua pa nan, y keda sin firma un contract.

Pero algo por pasa. Bieuwnan sa usa e verbo: "nada no ta pasa, te ora e pasa" y ora algo pasa ta simplemente laat.

Hotelnan a veces ta gusta pa un grupo firma nan contract, pues un contract cu hotel mes a formula. Nos recomendacion ta pa semper traha bo propio contract, o pone bo propio clausulanan den esun di e hotel.

Un contract semper mester ta bon pa ambos banda. Asoma den pasado a yega di trata e punto aki den un di su reunionnan, pero no a concretisa un opinion ni a yega na un

conclusion.

Pronto lo ta asina cu un abogado lo bay formula un contract cu tur grupo por usa y depende di e tipo di contract por haci ajustacionnan.

Tempo no ta manera antes mas. Awendia un artista o grupo mester ta masha cauteloso, y percura pa boso ta proteha.

Pa experiencia nos sa cu den pasado hopi agrupacionnan a yega di haya nan den problema pa mptibo di a keda sin firma un contract o nan contract no tabata bon formula.

Nos sa tambe cu tin hopi grupo no sa kico ta

cuminsa na hora. Si un fiesta mester cuminsa 9 or ta 9 or mester cuminsa toca o e ta un kiebra di contract.

No lubida cu propaganda ta ser haci via di radionan y corantnan cu e fiesta ta cuminsa tal hora.

Si esaki no socede, cualquier persona por reclama y cu nan derecho.

Mi no ta desea di bay mucho den e aspecto di ley, pero si recomienda pa tur agrupacionnan musical, solistanan, etc, semper traha cu un contract y al mismo tempo cumpli cabalmente cu e contract.

NOTA HISTORICO

Awe dia 4 di Juli ta un fecha historico pa Aruba. Naturalmente cu e fecha di 4 di Juli mundialmente ta wordo recorda awe cu Estados Unidos a bira independiente desde 1776, y nos tambe como isla democratico ta recorda esaki.

Nos historia di 4 di Juli ta algo chikito compara cu esun di Estados Unidos, pero si lo ta bon pa nos recorda cu 60 aña pasa dia 4 di Juli 1925, e promer avion, un avion di awa (watervliegtuig) a baha dilanti di Paardenbaai 9 or di mainta. Casi tur habitante di Oranjestad a bay para dilanti di waf pa mira e fenomeno aki. Na bordo di e avion, ademas di e pilotonan, tabata Gouverneur Mr. Nicolaas J.L. Brantjes (1921-1929) y e Havenmeester-loods di Curacao, C. Hoek.

Frater Maria Radulphus cu na fin di juni 1925 a bini Aruba pa haci algun tarea ariba tereno di ense-

ñanza, a puntra permiso si e por regresa Curacao den e avion. Gouverneur Brantjes a concede Frater Radulphus permiso pa viaja cu nan a bordo di Idoor. Frater Radulphus a conta despues cu ora e avion a lanta por lo menos tres bez el a kere cu e "cos" ey lo bay cay. Cada bez e avion tabata haci un descenso di golpi di por lo menos 25 meter.

Esey tabata spantoso, el a comenta. E avion despues a estabiliza ora cu nan a alcanza mil pia di altura. E avion a baha na Schottegat y a taxi na Sint Annabaai.

E avion Idoor tabata pertenece na un compania Aleman. E mesun compania aki a lanta e compania di aviacion Scadta na Colombia. Cu comienzo di segunda guerra mundial na 1940 tabata imposible mantene e compania Aleman y Scadta a converti den Avianca.

HOMENAJE NA MARTIN QUANDUS DEN BUTISHI DI ALEGRIA

Diadomingo awor, Mundo di Musica, ta invita pa ta hunto cu Eddy y Ito den Butishi di Alegria pa contribui un poco cu nos comentarionan durante un programa especial dedica na Martin Quandus, kende desde 1970 a drenta e mundo di musica.

Pa nos semper ta un placer di contribui, e poco cu nos por, y tambe ta semper un placer di traha un rato na banda di Eddy y Ito Tromp personanan cu pa mas di 25 aña a

contribui grandemente na nos cultura Arubano.

Ta fresco den nos memoria con aña pasa e prestigioso festival di OTI a wordo dedica na Eddy y Ito Tromp pilaarnan incansable di Butishi di Alegria.

Un biografia amplio a wordo publica caba di Martin den bo DIARIO y nos kier a agrega cu nos ta sumamente orguyoso di Martin cu por a yega asina leo manera e tabata desea den e tipo di musica cu

e ta gusta mas.

No solamente Martin ta un gran amigo y colega pero e ta tambe un bon consejero pa hopi cantantenan den temporada di carnaval y un excelente compositor.

Nos ta felicita Martin cu su tercer lustro den mundo di musica y invita henter Aruba pa scucha Radio Kelkboom Diadomingo awor 2 or di merdia ora Butishi di Alegria lo duna honor, una vez, na un yiu di tera.